

水

曹

清

暇

錄

水曹清暇錄卷三

古歙詠菴汪啓淑述

乾清宮丹陛之下有洞名老虎洞洞上御街洞
中甃石爲壁可通往來明熹宗曾于月夕與內
侍戲賭迷藏見天啓宮詞注

國子監彝倫堂前古松相傳是元許衡手植諸
生倣紙每季例送光祿寺作麪袋

玉田縣城南五里產玉田沙其泉清淺甘冽沙
從地湧色白如銀攻玉者藉之以琢玉器第盛

之必以猪胞若用紙帛雖數十襲亦漏

熱河西瓜有一種碧色者號琉璃瓦味最甜大

似哈蜜所產

協辦侍讀中翰張亦忒華萃偶以細故拂金壇
意勒令告病歸留別同人有詩十章愴惻典雅
可誦漫錄數章於此其詩云旅食京華閱十春
西垣長是掌絲綸曾陪鴛鴦誇仙客可許江湖
作散人臺閣規模雙眼闊師生晨夕數年親自
慙老秃竽徒濫去住臨風劇愴神一脫朝衫體

便輕思鄉不是厭承明竹竿雖許鮎魚上跛足
難追老驥行開籠鶴將隨意舞還山猿豈向人
鳴年來紅芍茗苔句棖觸離羣折贈情文章敢
詡中青錢捧得名經已惘然韋杜但瞻天尺五
鯢鵬猶隔路三千澆愁常借他人酒遣興還吟
感遇篇最是排雲闔闔迴夢迷何處聽鈞天踏
遍東華十丈埃倦聽早鼓入蘭臺揮毫共藉書
生手調鼎終須宰相才貧極微吟渾似病門閒
舊雨漸稀來劇憐迢遞柴桑里松菊何人歲歲

我天涯腸斷望江南風月秦淮我最諳新曲未
妨翻子夜舊人猶想遇何哉司空揣量三宜退
中散心情七不堪好向草堂吟賞處桃花片片
柳毵毵回首觚稜近五雲朋簪倏爾一襟分旅
懷拚作歸田賦家祭須焚誓墓文高致我慚陶
靖節虛名人擬杜司勳臨岐多少蒼涼感詩半
魂銷酒半醺

孫枝發劉必通京師時下製水筆名手也人肯
輸二三星易一牀者亦極純妙然不解縛滿鋒

羊毫一種

太醫院有古銅人相傳海中湧出者虛中注水
關竅畢通用以考驗鍼灸古色蒼碧瑩然射目
簡儀在瞻象臺元耶律楚材率郭守敬造推步
索不失銖黍天巧鬼工迨稱絕技

白雲觀有長春宮卽元太祖命處耶真人者真
人號長春宮因是得名日下舊聞云元長春宮
有二一在太液池上引王惲清明日遊長春宮
詩爲據按元太液池卽今白塔山下池也至元

間已爲禁地。憚詩所詠多道家事。元雖崇信佛老之徒。然不應使與嬪妃雜處。且元制遊皇城。在中秋後。若清明亦非學士遊詠禁地之時。輟耕昭儉二錄載元西苑最詳。俱全載長春宮事。竹垞蓋據長春本行碑有浴太液諸語。遂擬議爲之考。廼賢金臺集南城雜詠有西華潭詩。自註金之太液池。則太液池金元實有二處。本行碑所載或非元之太液池也。惜西華潭世遠蹟湮。無由徵信。

頃見湖州閨秀沈省題二如居詩臨江仙一闕
頗佳惜末由得其詩登之擷芳集也其詞云午
睡醒來茶熟未清風淨掃心田金鱸漫注水沉
烟把君詩一卷細細讀花前南望不知相隔遠
美人秋水娟娟魚書欲寄擘雲牋問君珠幾斛
才許抵新篇

劉可成雲南寧州人隱華蓋山結廬僅堪容膝
能前知人禍福晚年辟穀日惟飲酒雖履霜卧
雪中而無寒色年踰古稀齒髮更生一日作偈

云亥時閉子時開七十餘年去復來坐化越七日香軟如生

上智菩薩卽崇禎帝太后早薨追畫御容輒云不似詔照劉文焰貌所畫成者

山東萊州石其色深青然透明光潤卽古之菜玉也人多取爲名印亦有白色者石未出土時性軟見風卽堅或爲鐫銚久堪烹飪味妙於銅鐵器

前明大內猫犬皆有官名食俸中貴養者常稱

猶犬爲老爺見筠廊偶筆衛懿公之鶴乘軒不足恠矣荒謬至此殊堪浩歎

甲午科龔太史大萬及姚宗政梁同主粵西試首題爲斯民也二句某房考得一卷甚佳欲行呈薦夜夢一人告之曰此卷必不可薦其人三破人婚姻大損陰陽薦必不售某以夢寐不之信仍薦之後復夢其人曰某卷係抄襲勾山陳兆裔舊作窗稿中有其文可查也薦而不售其人衣巾尙在薦而獲售援新例必除名汝雖無

大處分何執拘如是耶某以夢白于主司其言
吾輩識勾山文足徵眼力若置前列恐致人疑
或遭磨勘附榜末應無害也及到部磨勘者復
夢如前因以抄襲陳文除名蓋定數果報不可
逃也

張相國允隨開府雲南時有女行六許字陳方
伯德榮之庶子曰藩越十年而藩死女摘環剪
指以奔喪請母夫人曲致之不可聞于陳氏陳
氏之叔母在京徃而禮辭女衣其喪父之衰服

以見於邑悲號相對酸鼻而不忍言遂赴安州
送葬哭泣甚哀感動路人旣葬則奉夫主于室
中朝夕瞻拜時時焚香而砌土甓于其側身自
居之有嫠婦見而自訟曰女公子也而屏鉛華
受清苦至于此極喪夫之禮固如此乎吾知守
節而不知盡禮愧何如之貞女請於君姑以夫
兄之子繼昌爲後教誨成立弱冠入州庠庚子
登賢書

玉蘭馬纓皆夜合牽牛鈴兒皆晝合葵能向日

鞠制頽齡不得謂草木無情矣

古來失傳之技擊壤長嘯劍器舞彈棋惜無博雅攷據明晰而興起之

潭柘寺晉名嘉福寺唐名龍泉寺舊志云山多柘故名今無之矣寺中向有廬師所降大小青龍紅篋覆之今亦不見

徐暎玉字若冰吳縣閨秀爲沃田沈大成詩弟子有南樓集且兼學佛臨沒神識不亂起坐說偈云來從梅花來去向蓮花去去來本無心無

相亦無住

各省皆有譚名予所知者江西號臘鷄頭浙江號鹽豆餘俟暇日續訪之

北上路程甚遙所經過州縣又多殊難記憶示我周行太覺瑣碎頃閱前明鄞人張得中大本北京水路歌頗便誦習漫附于此其歌云四明古稱文獻邦望京門外西渡江水驛一程車廐遠舜江樓頭橫石杠新中二壩相連接上虞港內還通楫梁湖曹娥潮易枯大舟小舠重難涉

東關漸近樊江來薰風廿里芙蕖開賀監湖光
淨如練繞門山色濃如苔紹興城外水如碧櫓聲
搖過蓬萊驛柯橋遠抵錢清灣劉公廟食居其
間新林白鶴路迢遞日斜始得瞻蕭山夢筆橋
高對江寺雙塔亭亭各相峙古碑無字草芊芊
猶羨文通好才思西陵古號今西興越山隔岸
吳山青錢唐江接海門闊胥潮怒捲轟雷聲杭
州舊是臨安府藩臬三司列文武坐賈行商寶
貨煩錦繡街衢百萬戶北出關門景如畫竹籬

人家酒旗掛臯亭臨平談笑間等閒催上長安
壩崇德石門逢阜林灣邊三塔高十尋嘉禾却
過杉青聞黃江小路吳歌吟平望吳江眼中過
繁華地屬姑蘇郡楓橋尙憶張繼詩夜半鐘聲
又信疑望亭無錫人烟多旣庶且富聞絃歌瞬
息毘陵暫相泊奔牛呂城容易過丹陽與丹塗
鎮江人共游鐵甕城形環上國金山塔影浮中
流揚子江邊卽江漢浩浩蕩蕩茫無岸甘露招
提鎖翠微舟人遙指凝眸看一帆送過瓜洲隄

船行迅速如岸移維揚厚土瓊花觀覽游試問
黃冠師程奔邵伯高郵路界首沿流水如注菰
蒲深處浴鴛鴦湖浪滔天似潮怒寶應縣寶縣
湖荒城已廢存浮圖古淮大道通南北物阜民
康軍餉儲漕運循規事專一密密征帆蔽天日
桅檣接踵連舳艫舵樓按歌吹簞簟清河口土
高厚淮陰城臺至今有桃源縣接古城墟宿遷
旋覺人烟輟直河下邳地漸隆子房圯橋遺舊
踪馬家淺呂梁洪箇師須倩少年雄壽亭尉遲

古名將金龍之祠屹相向守邦治水各有功來
往祈神乞陰相快馬船飛莫能遏鑼鼓催瓊號
聲喝一淺一鋪穿井泉溥濟兵夫往來渴徐州
踰境山夾溝至豐沛泗亭况對歌風臺臺下每
驚流水滙沙河谷亭間最難湍流榮回却船退
南陽棗林次魯橋澎湃水聲翻雪濤師家仲家
勢亦險新閘新后坡尤高石佛趙村頗平靜濟
寧任城及天井棲草二閘迨開河支山小驛來
俄頃柳隄金線籠暮烟小河張秋燈火船荆門

阿城各二閘七級上下相勾連周家李家閘流
急崇武東昌舊城邑楊青臨青當要衝百工紛
紛其閭集衛河渡口夾馬營故城小市猶傳名
德州良店連窩城東光新橋從此經沽酒澆離
愁必與朋簪共夜深風雨打蓬牕五更驚起思
親夢明朝涉磚河順入長蘆灘乾寧興濟青縣
關河流靜海楊青站直沽楊村吹便帆河西務
河合縣灤縣相將廻城域張家灣上趨通州半
肩行李惟書籍我本江南儒宦游至於此所經

之處三十六所歷之程兩月矣其經水閘七十
二約程三千七百里薰沐整衣冠肅造鵷班列
九重紅日麗青天四海奇珍貢金闕賢能輔聖
朝共享昇平福我曹功成奪錦袍早沐恩波食
天祿

東瓜木出鳳皇城狀如柳樹皮青肉赤志書稱
可作硯且甚發墨

湖南永州康熙元年三月雨米其色黑名之曰
青飢飯人食之可愈疾見省志

治火灼湯泡方用真麻油四兩下蒿苳殼十箇煎黑撈去渣乘油熱時下白蠟二錢便其溶化冷時入輕粉二錢調塗患處立效如神屢試皆驗兵部職方正郎武公調元所傳

海康縣之討綱邨前海嶼之墩上有古樹擁腫槎枿號龍王樹有井味淡號龍王泉天旱酌井中水樹下祭之則得雨見海康縣志

黃石齋先生漳浦縣人登天啓二年進士其家圃中有赤石長數丈大數圍母夫人夢石墜而

誕先生故號石齋誕後石旁生荔枝一株閱十年生實味甘色潤有翰墨香及先生領鄉薦擢南宮登翰林荔枝結實加倍先生殉節後荔枝亦枯見陳鼎荔枝譜及福建通志

雍正十三年四月 盛京遼河得一魚重三百六十觔無鱗刺惟背上有若骨者一行煉其油色赤不知何名

瘞錢起於漢時直以錢瘞冢中至唐王璵祭祀以楮鏹便於焚化然南齊東昏侯好鬼神之術

剪紙爲錢以代幣帛原不始於王璵蓋及唐而盛行耳

祭祀熏壇香名九合蓋用沉香排草降香冰片檀香清遠丁香蘇合油麝香九物內庫合造香甚幽韻

龍蝨形如章耶蟲色深黑羣飛海濱人掩捕得漬以微鹽曝乾閩人多以下酒

節慎庫始於前明嘉靖初年因工部尙書劉麟以四司財物防有侵漁特請設此節慎庫專一

印官理之

聞之耆舊云宗室瑤華道人言蒙古某額附嘗
射得一狐其後兩足輟紅鞋足亦弓彎與女子
無異

紫筆多用兔毫而東坡間亦用鷄毛筆山谷用
猩猩筆唐潘遠西墅紀譚云南朝有老姥用胎
髮製筆尤佳則更新矣

北海李邕所書雲麾將軍碑有二其一爲李思
訓作在陝西其一爲李秀作在良鄉縣後入都

中被人斷爲柱礎

自來鐘在永清縣譙樓上路史云唐貞觀末桑乾河決土人於水次得一鐘篆文斑駁甚有古致遂呼爲自來鐘明尙書王遴曾有詩

駱駝遇夏日則必褪毛以避炎暑考相駝經云行之善者如龜如龍如馬如蛇如鷹如雁

口外有一種駝懶乳其駒近身則踉蹌之駝駒飢欲斃牧駝人有知其性者坐駝旁吹笳作鳴鳴哀腔老駝便生憐憫心仍乳其駒

元時塑神像高手劉鑿最工宦亦顯達其所塑
都門有數處如天慶宮等處是也

長洲沈業師歸愚先生詩多規撫唐人而摹李
杜頗得神韻其詠物詩亦娟秀清新詠夾竹桃
詩云柔條灼灼復猗猗翠篠紅芳間一枝似借
淇園君子德好添南國美人姿迎風含泪憐湘
女抱節無言訴息媯自是有筠兼有色何妨開
到薄寒時詠半錢詩云姹女河間數忽停飛蛺
已破舊時青平分輪郭難成式盡改方員不受

形留得看囊仍是澁縱教使鬼也無靈沈郎榆
莢依然在圓影垂垂散滿庭

雍正十二年十二月初三日未時山東兗州府
寧陽縣鶴山毓生瑞麟身長一尺七寸高一尺
三寸玉定文頂首含肉角鼻準隆起孔若芝雲
雙瞳炯炯有光眶赤如炬兩耳卓立孔有彩毫
徧身鱗甲頭頂純綠色自肩脊至尾間皆青色
甲紋方圓相綜界畫如圖腹腋悉屬細鱗青黃
交暎甲縫有黃白彩毫長五寸共一十九節通

尾青鱗節縫紅黃色尾尖有黃色彩毫一大縷
四蹄周整碧潤如玉前趾各有黃毫麕身牛尾
一角圓蹄茂質華文光彩煥發山左大中丞岳
濬繪圖志瑞 國朝麟見已非一次頃偶披閱
此圖因漫錄之

虬龍冢在萬壽山後埋猫處也猫名霜眉嘉靖
時所畜者毛色青性巧狷嘉靖甚愛之後死奉
敕所葬

頃見家上湖紀歲詩編該博艱澁甚有可觀漫

摘數篇於左其詠牛詩云眼底髡屯甚洪康就
手牽其牢輸馬橫下括讓羊先努力食細草低
頭耕大田純離誰爲爾齋角掛殘編其喜晤金
質夫卽送之保定詩云聽傳吉語自盤山纔攝
驚魂已破顏人別十秋幾永訣身回九死竟生
還星行望國霜天外旦起治城土石間好去力
田歸有日感深安得畏投艱其晚抵臨清得盧
司臬札詩云會通河曲暮烟凝釀雪雲抵水欲
冰孤塔岸移迷語鐸遠帆旄動颭懸燈置郵轉

漕初逢腊酤酒衝寒正舉升徙倚張橋店邊泊
忽傳魚網得神綾

張家灣之名起於元時因萬戶張璧督海運至
此故名在通州南十五里

習俗掘井之法先去浮面之土尺許以艾作團
取火炷而炙地視其土色黃則水甘白則水淡
黑則水苦凡見黑則易其地而掘

康熙三十八年崇文門內東四牌樓地方生意
最盛一日忽有道士手掇燒餅一筐挨戶揶賣

每至一家輒云買大火燒三日後突遭回祿道人所至之家靡不焚燬東西南北四座牌樓相距各數箭遠火星飛延一時俱爲灰燼道人亦不復見

鯊魚子從口生出大者能變爲虎爲鹿其皮堅利可爲鎧可爲鞞肉粗淡而無味其翅去骨入饌殊妙

前明門狀名紙皆用白者通籍後遇元旦賀壽用紅位尊則平時皆用紅矣今時人初入泮尙

用白束過此全然用紅而山人布衣墨客恬然用之

八人轎乃南齊書明帝諸子江夏王所乘八摺輿也今人每錯會意以八轎爲八座

市中所貨取燈兒卽古稱引光奴也剗薄木片蘸以琉磺得火便然殊多利便

水曹清暇錄卷四

古歛詠莽汪啓淑述

客有貿易江右歸云聞康熙戊申年間南昌驛
旁一僧菴頗饒水竹勝有西人樂之雉髮留居
焉然寡言語日惟面壁如是數載一旦沐浴禮
佛辭長老云當涅槃遂趺跏菴前鼻間迸火自
焚俄而頂中飛出白鶴高翔雲際盤旋久之里
人悉見南昌監司周體觀曾有化鶴記

古人詠蝦蟇蟹醬詩極少新城王阮亭有二絕

雖只輕輕帶做亦殊不惡其蝦醬云香稻惟宜
鄭宅茶清流挑菜煮黃芽東堂不乞殘鵝炙自
擣廉姜謝豹蝦其蜆醬云外骨何須詫兩鉗寄
同蚶醬味能兼稻黃蘆白秋風岸夜火沙頭候
蜆簾

天主堂在阜成門內東隅西洋人奉耶穌教者
明利瑪竇自邏巴國航海九萬里入中原萬歷
間賜第於此居之堂中佛像用油所繪遠望如
生器皿頗光怪陸離

仁和吳司馬廷華義鳳行葢感王一位事而作也一位鹽山縣人乾隆二年閏九月於寶坻貿易歸經天津挾重資早行至高沙嶺爲盜所害劫資去一位所乘鳳急歸宿店以首擊門店主啓戶視之鳳哀嘶若訴牽置廐中不食莠豆因疑之曰爾如有冤可導我去鳳隨躍出戶奔至一位尸所店主其鳴之官懸賞購得眞盜繩以法其義鳳行詩云高沙嶺頭霧四塞北風森森殘月黑野店有客挾重資跨鳳出門未辨色長

鞭策羸羸不行羸有戒心難自明荒雞聲裏強
就道暗中忽有金鐵聲客素能兵力稱最不料
危機伏意外抽刀擊賊身忽顛賊鋒已中客要
害囊貲席捲剩客屍客屍卧血紛淋漓陰房鬼
火慘林木舊鬼歡迎新鬼哭新鬼哭人不聞義
羸怨氣欲遏雲衛主愧乏侍中血口不能語心
如焚報讐須向賊巢去恐爲賊拘不敢遽道旁
四顧重躊躇忽記昨宵曾宿處回來走撞宿處
門主人驚起燈燭昏開門認得前客騎胡乃背

主獨反奔懷疑姑令暫入廐廐下尙存昨棧豆
羸方滴淚堅不食怒嘶不翅獅子吼朝來吼聲
驚四隣對羸無策相咨詢就中鄉老號有識知
羸當有怨欲伸謂羸此豆爾且啜爾冤我當爲
爾雪轉呼同伴走前途途遇客屍認模糊先是
客家夢客報尋跡至此逢鄉老八邑急啓大令
知大令已若神告之懸賞大索不旬日爲客獲
盜歸其貲家人語羸羸得意飽食欲隨客入地
一時圍阜控勒嚴雙睛尙灑臨風淚嗚呼噫嘻

此義巖與人一心久不磨昔聞蘆臺有義犬與
巖毋乃稱同科老夫執筆重大義敢擬玉臺龍
友之雅歌

湖廣閨秀張秀字惠中和阮亭三絕句乃雍益
集板橋官渡塾巾亭三絕句也惠中薄命詞三
十首爲時傳誦內有記得新恩明似鏡會梳高
髻插金簪之句

火房蓋以宿窮民無被褥者及流丐人屋內泥
塗昏糊使無纖隙積鷄毛二尺許人宿其中可

免僵凍

寧波府城內天一閣明嘉靖時范司馬東明藏書處也予因祝吳軍門進義壽至其地偕全編修祖望曾登覽焉隣人相傳閣上常有光怪書雖富而蟲傷鼠嚙者甚多

腐乳題詠甚少阮亭王尙書一絕不落瞿謝窠臼其詩云黃羊紫蟹解傷脾濁酒年來亦懶持才喜紅蓮香稻熟黎祁又著淡胭脂

郝伯常有天賜夫人詞因成都芊氏於中秋夜

被風吹至梁家相隔五千餘里人皆以爲天賜
因成夫婦又山東新城縣王氏先世嘗傭工於
人家一夕大風晦暝有女子從空而墮自云祁
氏相隔五百里餘主人以爲夙緣令偕伉儷又
山西汾州羊子壽於大風中墮一女子於其庭
自云秦氏家在真定竟爲室焉何彼蒼之屢爲
蹇修而不憚煩也

正月八日俗傳諸星下界京城內外菴觀寺院
僧道多攬檀越施主年庚陳設祭品爲壇而禳

冀得香儀亦有本家庭院燃燈自祭燈數以百
零八爲度間亦用四十九盞習以爲常

邵武府治有大石榴樹科場之歲士人視其結
實之數以占登第多寡頗著靈驗

草衣道人王微字修微江蘇揚州人參禪有得
壽最高 國初尙存予故選入擷芳集頃又見
其所著樾館詩選佳句頗夥附錄於此其偶作
詩月涼山氣淨風斷雁聲孤吳江舟次半窓殘
月夢幾樹斷烟愁雪夜小泛灘聲疎落雁鬼火

怯啼鳥閒居意
暝從雲宿庭
虛待月行
汪夫人以不繫園詩見示
賦寄春隨千嶂曉
夢借一溪烟閒步
菊荒籬影澹
葉積澗聲微
咸有思致殊可誦也

功德寺在西湖極西中有字碑二其一乃番字又有刻絲觀音一燈板菴禪師又有木球能供役使今皆不存

江都縣四望亭北有螃蟹巷巷之居民某嘗得一蟹不忍置諸湯餓聽其郭索于砌下歷月餘

其妻與所私者殺某瘞床下詰朝縣令方據案
判訟牘螾忽援堦而上令素精察疑此必有鬼
憑之者因諭之曰如有寃當命卒隨偵之蟹下
堦出卒踵至其家螾直入床下卒發地得屍令
鞠論姦殺之男婦如法螾竟不復知所徃居人
異其事以輓鐫螾嵌巷壁巷緣此得名今輓螾
宛在雖歲久不少剝蝕

騶虞詩經傳曰獸名白虎黑文山海經云騶虞
五采畢具尾長於身乘之日行千里騶虞可騎

奇甚騶吾騶牙是一獸聲相近而字異耳

大朝午門之外陳設象輦馬輦步輦各儀從鹵簿及象馱寶瓶對象立杖其用象非獨取以壯觀蓋象性馴雖獸屬而通人意其先後皆有序次卽食料亦有品第羣臣進午門畢則交鼻作闌退朝樂作始解

宛平王相公怡園在米市御術跨連爛麤諸御術極宏敞富麗竹垞朱檢討有同陸元輔鄧漢儀毛奇齡陳維崧周之道李良年諸徵士讌集

怡園詩六首其詩云北斗依城近南陔選地偏
綵衣逢暇日珠履託羣賢山擁墻初亞林疎徑
屢穿身隨沙際崔飲啄到平泉石自吳人壘梯
懸漢棧牢白榆星歷歷蒼蘚路高高宛得棲林
趣渾忘步履勞下山無定所隨意各分曹澗白
泉初徙籬金菊未枯夕曛含畧約亂石點榜蒲
密坐千人許迷塗八陣俱不因爨烟細何處覓
行厨風磴雙亭外疎藤蔓十尋龍蛇寒自蝨鳥
雀暮長吟待結千花墜應同萬柳深隔林催未

起獨坐想濃陰屢滿西南戶堂臨上下洄落成
凡幾日勝引喜先陪監史新圖格壺觴舊醖醅
謝公能賭墅會見捷書來小閣簷端起虛窓樹
杪憑忽驚黃屋近更繞翠微層九日今年悔諸
公逸興能尙書期可再雪後轉須登

夜明木多產北京山澗中蓋倒木在水歷久不
朽夜則明如聚螢竹垞朱檢討有賦

房山縣有上方山由孤山口經石梯而登石梯
卽就山石畧加斧鑿僅容半趾山勢甚陡兩邊

故垂鐵絙便人攀援竹垞朱檢討有詩云山心
夜不寐凍雀喧前窗香厨卯飯熟傑閣晨鐘撞
柅車束櫪馬各雇輿丁雙彎環柳捲椅夾以棗
木扛舍村入坡陀百折循崆峒萬古此積石山
農絕耕耒短松走長根老樹撐空腔徑盡緣仄
磴險過梯雲杠置身縹緲間若掉都盧橦層軒
坐僧榻喘定心猶憊山頂
△平堯率院居其中
央竹垞詩云幽燕古奧室堯率居中巖花宮七
十二下上東西嵌六時響魚鼓四面圍筠杉沙

泉細流續石壁遺經劖欲探乳穴勝改著短後
衫其中路竒糾其外雲封緘百千羊須珠徃徃
垂龍銜所嗟脚力弱畏此高嶄嶄山僧飯我腹
朴野言多僂嗣歲期重過同把黃獨饒左邊山
下一斗泉頗清冽竹垞詩云昔尋一斗泉俯睨
千花塔壯歲不知疲三日行兩市重來筋力倦
十五換僧臘已拚百骸困猶幸半踵納崖傾旋
曲蝸石扁鏤文蛤雨暘迭晦明龍虎互乖合忽
焉松門在茅屋向斜搭短綆汲澄泓微風吹颯

沓精廬憺忘歸惜未攜酒榼向下招游朋仰視
笑不答山有十三洞遊甚艱難然舊傳洞中石
肖龍虎鐘鼓羅漢靈芝蓮花不一而足洵乎奇
境也

唐李賀字長吉隱居昌谷晨出命小奚奴負一
布囊得句卽投囊中暮歸再足成之故曰奚囊
宋張文潛春遊昌谷訪長吉故居有句云惆悵
錦囊生遺居無復處則又可稱錦囊矣

遵化縣石門峽有石將軍聳立峽西崖上儲巘

大華清耳金
詠石門峽石將軍詩云精爽千年護石門晚風
黃葉亂山村時危暗灑英雄淚貌古全無斧鑿
痕故壘夜嘶惟石馬老兵秋醉只匏尊望夫多
少山頭婦不似將軍殿塞垣至今尙存

縱囚復歸人皆知唐太宗事而後漢中山相戴
封已先行之矣見後漢書獨行傳

懷柔縣有紅螺山去縣北約二十里頗高峻有
泉一線湧如噴珠故名珍珠泉潭中二螺殷紅
色入夜時吐光燄故得名麓有資福寺金朝皇

統初所建

晉傅咸有回文反覆詩溫嶠亦有回文詩故竇滔壽蘇氏效而織錦回文焉回文實非起於蘇氏宋張睽妻侯氏又繡迴文龜形詩進上賜綃三百疋

枇杷山在豐潤縣北三里許或云琵琶山蓋以形似稱之耳山土潔白如粉可擦銅錫器可飾屋壁

李玉谿詠賈誼詩云可憐夜半虛前席不問蒼

生問鬼神議論正而意新又切本人事真學杜之入室高弟也

仰山寺有明姚少師廣孝畫像其自題贊云這個禿厮忒無仁聞名垂千古不值半文惜自悟之晚也

辰者日月會次之名歲有十二故分爲十二次古者列國各以其國所屬分野占徵祥周禮保章氏註星紀吳越也元枵齊也娵訾衛也降婁魯也大梁趙也實沈晉也鶉首秦也鶉大周也

鶉尾楚也壽星鄭也大火朱也析木燕也疏云
吳越在南齊魯在東今歲星或北或西不依國
地所在者此古受封之日歲星所在之辰國屬
焉故也然此十二國分野乃古堪輿所傳尙有
諸國苗夷亦同照臨不過大畧舉之耳其用之
人事者則有十二辰之名所以紀月數其命名
之義則取陽氣之出入升降以成歲功者爲言
後人以此布列於天以代十二次以紀月建及
日所加之時故十二時亦謂之辰焉又北極謂

之北辰又日月星謂之三辰四時謂之五辰又
水星謂之辰星又房心尾三星謂之大辰

前明米仲詒園有三處曰湛園在西長安門曰
漫園在德勝門曰勺園在京西海淀

于少保謙祠在崇文門裱背巷卽公故宅也公
被害係天順元年復官係成化二年初謚肅愍
改謚忠肅

壽安寺在西山半道金章宗費數百萬帑金營
八院有巨石獸蹲踞臺下者名清水院泉聲錚

琮古木葱蒨最幽勝幾忘身之在冀北也章宗
又冶銅五十餘萬觔爲佛像設寺役率七千人
御史觀音保鎖咬兒哈的迷失等極諫皆棄市
壽安山上有章宗手植古松經今五百年尙蒼
鬱離奇初白查慎行有詩云壽安山頭一老松
從下仰視青童童羽衣僊人擁蓋立柄短却作
偃僂容我思躡屣苦無伴范老興到許我從婆
娑初自枝亞入中乃可置一畝宮四傍四枝分
四面側理橫出交蓬鬆東西南北不相顧意到

各自成虬龍中間大枝裘挈領高勢一攬收羣
雄其旁峭壁截牙角直下千尺方藏鋒蒼髯翠
尾掉空際蜿蜒飲澗天投虹千山萬山似搖動
鱗甲未斂雲濛濛須臾夕陽轉西麓脇下罍罍
生微風一聲老隹忽飛出竽簫散入隣菴鐘老
僧指似時代古手植傳自金章宗是時朔南罷
兵革貢使一一舟車通明昌泰和號極治擊毬
詐馬習俗同近郊亭館恣遊宴逐獸不入深榛
叢遺山野史有深意國亡事去忍更攻孤臣飲

泣記舊恨肯畏後世譏不公洗粧樓空春月白
射柳園廢秋花紅一朝故物獨留此鬱鬱幸自
蟠蒼穹爾來四百四十載坐閱桑海如飄蓬輪
囷差堪伍社櫟蕭灑獨足驕秦封君不見報國
門前數株樹託根悔落塵埃中

麻姑有四人一降蔡經家與王方平談道一石
勒時麻秋女於望仙橋飛昇亦名麻姑一玫和
中建昌人於姑餘山得道亦名麻姑一畊餘雅
銀云麻姑姓黎字瓊仙唐時放出宮人也

各部題本歷敘原委不無繁冗故設貼黃字數毋許踰百考唐制已有貼黃二字蓋施於詔敕耳前明崇正年間輔臣李國檣奏行撮黃之式始爲定例

天台縣向多楸拙土人有巧思者湊接成几椅最爲古雅近見琉璃廠有以鹿角鑲成椅者殊爲創見爲之眼新

痛父死於非命每誦哀哀父母輒爲流涕門人爲廢蓼莪之篇不僅晉王裒一人也南史顧歡

早孤讀書至哀哀父母生我劬勞便執書慟哭
受學生徒遂廢蓼莪

羅丹麀鹿蹄腕骨也偃仰橫側四面各不相同
琢磨瑩潤如玉蒙古女婦嬰童團坐持四枚隨
手拋擲爲戲擲如各得一色則爲四色全具以
此分勝負焉卽穴骼之遺意耳

唐侃綠旗人曾隨大將軍費楊古出征昭木多
頗有功雖在軍營猶挈琴不廢操縵撫弦及凱
旋雍正年間賜以副都統銜准予告居西山下

相傳品甚高雅性愛潔有儒者風今上曾幸
其廬賜詩褒寵焉

高粱橋至圓明圓香山夾河兩岸近開水田已
有二千餘畝并連康熙雍正年間所墾爲數更
多而豐臺穿池築塘亦倍於昔故魚蝦市中不
斷菱藕肥嫩宛似江南惟少芡盤耳

近時發藍器皿顏色華美製造精緻直可方駕
景泰然工本甚昂四五寸高花瓶須二金餘資
本方成

大內有天然樹根筆筒中函石子可轉動而不可出洵逸品雅玩也聞係前浙江大中丞熊公學鵬所進

二十年來士大夫皆尙黑柿漆扇乳金字畫近則復古用白帋然尙未行純金面

醉龍前漢蔡邕也潛龍後漢馬畧也卧龍三國諸葛亮也鉄龍北宋謝德權也獨眼龍五代李克用也不睡龍五代錢鏐王也義龍齊釋惠榮也班龍鹿也玉臂龍藕也雅龍鯉魚也

辛卯歲祝■釐客都門率爾偕衛訥旃喬鷗邨
遊西山戒壇諸勝宿於潭柘寺分韻賦詩夜午
寒甚予時初病起行笈失帶長毛大裘因借僧
衣披之訥旃咲謂予曰大類宋釋可久陪東坡
遊孤山事

鋪首似卽今之獸頭銀取龍生九子之一飾於
門戶以辟不祥而兼守禦之意故長門賦有擠
玉戶以撼金鋪轉噲吟而似鐘之句蓋銀扣之
有聲也

西湖捏鉢湖裂帛湖卽今之昆明湖也裂帛泉
在華嚴寺北泉出石壁作裂帛聲故名寺左有
洞曰翠華中間天生石牀可以小憩古來題詠
甚多苔蝕惜乎不可卒讀

周元通寶古錢握之可禁瘡兼治難產見周櫟
園書影

水曹清暇錄卷五

古歙詠葑汪啓淑述

山陽侯樹菴家鉅富人稱爲百萬侯君其尊人
艱於子嗣晚乃得之賓客賀者絡繹飲醪燕會
者十餘日迨樹菴十歲召客演劇踰匝月及三
十歲時匭笥中所弄金銀忽化蝴蝶從封鐫間
出緣窻一一飛去樹菴第坐觀歎息無可如何
旣而貨財之滋生於外者亦日以零落不四十
而貧七十誕日寄寓老僧房中僧爲設齋致祝

樹菴低頭拜媿謝無以答卒貧死無斂具山陽人至今爲之嘆息程晉芳太史爲予述

眼鏡前明人始用之別名鑿鑿詠者甚少同學徐薈林有五排六十四韻甚典麗齒未中年候昏花眼就盲問醫慳秘術名匠發丹誠煉石天能補披沙地欲傾水皮凝激灑山骨斲崢嶸刮待金篦剗剗教玉斧瑱爬羅窮絕島梳剔遍深阮片片琉璃薄層層玳瑁輕探奇曾鐵網表異豈銅鉦鋸屑霏霏落磨稜霍霍鳴琢冰光滑澹

修月響鏗鉤製仿連環就形模合壁成桐圭頌
禁籞竹琰出嚴祊窈窕弓彎缺團圞瓊底盈端
相求酷肖比喻費閒評局鏑胚胎孕開緘礪礪
驚熊魂含炁肅虎魄發光瑩散彩輝雲母騰芒
耀日兄波澄三寸碧電閃十分明爛爛看牛背
焱焱睽鴿睛截肪珍楚殿照膽陋秦京淨洗朦
朧態爭標駿隼名西洋鯨客獻南海蜃人迎創
制遐方擅流傳遠道征載來紛越賈販去遍吳
僮街賣逍遙市招徠傀儡棚居奇誇照乘諧價

擬連城齟齬嬉相攫鯢鮓喜結盟姿憐蒲柳悴
性謝李桃榮銘佩金人固論文石友貞取攜手
版並什襲指彊并肘後囊垂錦胸前珮雜瓊全
身懸的的半面露英英瞥見腰閒掛旋看掌上
擎愛他塵不染笑我垢將萌抖擻停揮塵摩挲
罷舉觥傳觀僚佐集取用僕僮令欲試先攘袖
纔安更結纓整齊肩並聳屏當臂交撐蟻線雙
輪繫蟬紗兩角縈巧抽思乙乙幻出理庚庚鼻
觀莊嚴正睂峯妥帖平雪飄髯縷縷霜覆髮莖

莖繚繞睚邊互週遭頰上橫四圍祛障翳一握
發光晶隙裏山河現規中洲島呈霧濛披十里
月朗豁三更水剪瞳人湛星輝眸子瞪蝨心參
入細蚊睫鑑偏精稱葯君臣配分瓜子母爭構
蒲區勝負持掩較輸贏若輩逢場戲吾儕利筆
耕雕蟲勤校勘刻鵠費經營押字丁年便編詩
丙夜清烟昏披斗帳火燄閃燈檠讀畫延朝爽
鈔書趁午晴露凝和墨黝霞暈點朱頰小楷蠅
頭搨高談麈尾撏隨時尋妙趣卽事寫閑情覩

月跣趺坐障風跽跼行無猜余與汝莫逆我兼
卿習慣神原浹生疎意或忤升階妨策杖排闥
礙簾旌卸去衣船挂閑來硯匣盛賦成窮刻劃
別調有誰賡蒼林名薌坡江蘇青浦明經腹笥
博雅才筆斐然名噪江南北惜中年早卒

乾隆三十七年開四庫館徵訪天下遺書武英
殿移取九百種在京各官進呈九百八十三種
直隸總督進呈二百三十八種奉天府尹進呈
三種兩江總督進呈一千三百六十五種安徽

巡撫進呈五百二十三種江蘇巡撫進呈一千
七百二十六種浙江巡撫進呈四千五百八十
八種福建巡撫進呈二百零五種江西巡撫進
呈八百五十九種河南巡撫進呈一百十三種
山東巡撫進呈三百七十二種山西巡撫進呈
八十八種湖南巡撫進呈四十六種陝西巡撫
進呈一百零五種湖北巡撫進呈八十四種廣
東巡撫進呈十二種雲南巡撫進呈四種兩淮
鹽院進呈一千五百七十五種其採訪得書一

萬三千七百八十一種永樂大典重纂修得三百二十一種

禮部大堂後夙夜匪懈匾額前明嚴相國嵩所書大門左劉必通筆舖招牌筆法甚佳相傳爲董香光所書

慶公子蘭號似村文端公尹中堂繼善第六子也入泮後一赴棘闈卽棄去舉子業肆力於詩古文辭築精舍栽花種竹琴書自娛間作寫意水墨杜門取閒脫去朱門華胄之習所著詩其

已梓者有絢春園詩鈔予頗愛其西園晚步詩
云乘興邀同人散步西園裏小坐傍清池芙蕖
映綠水偶上採蓮舟閒鷗見人起落日滿空山
蟬鳴猶未已山房詩云山房寂靜隔囂塵寄跡
多年意倍親鳥弄數聲驚午夢花飛幾點報殘
春雲遮曲徑渾疑雨風動疎簾似有人獨卧小
窗饒逸興琴書一榻伴閒身小院詩云小院烟
初散青留石蘚痕捲簾通燕子鋤草護龍孫客
久渾如主離疎却似村低階遙映處花下別開

門晤蒨菴僧云詩懷岑寂向誰開極目園林翠
作堆千竹響時山雨過松風吹得一僧來殊饒
韻致

彰義門內長椿寺明孝定后時鑄造方銅多寶
塔宮繡千扇圖屏風智上菩薩像一軸按智上
菩薩者卽懷宗太后也三物至今尙存

關東鳳凰城桃花嶼山中近年亦產流黃聞之
進貂皮人云

皇甫冉暝色赴春愁赴字宋王荊公極稱獎之

然王昌齡已先有寒鳥赴荒園之句

本朝大祭必以山楂作棕色紅味微帶酸見毛西河詩話詢之內務府及光祿寺信然

虎坊橋眼藥菴有銅觀音大士一尊高幾五尺相傳前明萬歷時欽工造以祈福者

常州趙申喬大司馬容貌奇古性峭氣岸京師呼爲冷廟龍王蘇州何焯太史短小精悍多髯足智時人稱爲袖珍曹操

崇文門外有舊園址相傳 國初益都文定公

種柳千株築涼堂煖閣月榭風廊頗華麗常聚
鉅公朝士文人墨客極一時之盛今柳盡髡惟
一亭存亦屬拈花寺矣

吏部文選司求賢科石魁星最靈應會試之年
每每出現十餘年前石像毀於火又一古井天
生硃砂魚司官有得見者必膺選擢司門內有
明趙邦清行書穹碑其文云借銓衡之權而私
厚親戚鄉黨寧不媿此心乎仗清要之勢而暗
通關節苞苴誠得罪於君也萬歷庚子歲真寧

趙邦清書至今尙存

高文照號東井浙江武康人甲午孝廉洽聞強
記青年而著作等身乙未公車北上客死都門
集遂散失甚可歎惜予從友人案頭搜羅數篇
附錄以傳其聞邵二雲晉涵周林汲永年戴東
原震余秋室集諸君蒙名與修四庫全書却寄
次比部方昂韻詩云 丹綽旁求石穴書普天
光氣吐蟬魚洽聞端賴終軍豹薄技空慚黔地
驢亡去篇增安世篋

時奉 詔徵覓 皇史宬
失去永樂大典一千冊

載來學富惠施車諸公衮衮承天詔一夜都

空風雨廬太室香凝古俎尊弦弦清折映春溫

六經到底難高閣八覽居然在國門此日桓

榮方得力舊時董子絕窺園百川派別同歸海

休問江河清濁源跋扈飛揚定孰雄搶飛斥鷃

讓冥鴻席曾累坐詞休難經到縱橫文也工

後漢

書周舉傳京師語曰得解義晷三易外成名符

讀一詩中

宋余良弼教子詩云功成欲懸知遇

自殊頭角記取韓公訓阿符合關天數咫尺驂騑北地空萬函都聚大清藏

四部騰來策府光未惜裊蹏償竹素儘容麟筆

掃縑紉校從藜閣香開帙貯以巾箱玉識章

元仁

宗遣使四方旁求經籍識以玉刻印章命近侍掌之

多少人傳中秘事畧

如名將募龍驤漢廷講德會諸儒劍氣驚看動

鹿盧漬墨磨丹分几硯同和異器奏笙竽雍容

揖讓周三雅班駁文章夏六瑚回首青瑩燈火

地荒江風景不堪圖屈指浮生幾甲寅孤身天

地一微塵魏收木榻經穿久劉勰雕龍自鬻頻

曠典千秋遭聖世空山四壁有逋臣大官厨

味寧多羨珍重青藜照讀人又方坳堂比部自
杭買舟來湖出示西湖游作并訂交於鄙人行
將之京口秣陵北渡而還拉雜成此誌感詩云
吹來好語過西冷傾倒尊前眼其青名士不虛
生歷下賭詩曾識畫旗亭

辛卯夏入都先于箭
鋒坡酒家壁讀公題

句點開睂目妝逾澹洗出峯巒驚亦靈格是湖
山要擡舉蘭舟又繫白蘋汀仙曹署冷且休嗤
回首科名摘領髭暫乞身隨頰鯉釣不由官是
白雲司鷓鴣北闕應求侶鷗鷺南湖未可期姑

讓君家三拜客綸竿穩傍子陵祠

公詩有一笠一簑一艇子

辦香獨拜子陵祠句

雲天諠肯照蓬蒿敢說磁針結契牢

青紫勳名慵覓芥丹鉛事業鎮焚膏看花小隊

霜蹄騁說劒中宵夜月高但許爲龍共追逐孟

窮須不棄韓豪分龍雨過水漫漫送去江行五

月寒烟柳六朝留建業文章千古屬都官曾憐

鮑照眞才子

雅堂舍人

況有袁絲老將壇

隨園先生

料得

登臨同話我舊遊一一認憑闌又樊公子右民

招集六客堂餞送方比部旋東酒半率成長句

云飛霜莫解焦陽燥平原忽憶東頭好人與秋
風不約來涼堂一个開林杪此閒六客後先聞
此地從無車馬塵池上花猶蘇守種簾櫳月照
宋時人百年主又逢公擇公子風流尤好客善
釀傾來觴十旬隨陰展出牀三尺鎮心可賴鄭
瓜功隆熾難燒不熱衷水帛龍皮都屏却松枝
一握夕陽中須臾日落金波委碧天高捲湘簾
水銀河院落奏笙歌小部珠喉次第起別有林
亭燈火深一聲長笛劃龍吟正憐黃鶴吹梅調

忽動斑駁折柳心斑駁且繫青絲縷中岳遽飄
元放雨君不見幾許相逢襍蘖過主人頻蹙奈
渠何

琉璃厰遼時城外海王村也同部郎中補亭孟
澔提督琉璃厰時掘地取土得見李內貞墓誌
銘因爲遷葬且乞大興朱學士筠重爲撰碑並
樹墓前予聞亟爲跡之而內貞原石不數年間
已經遺失金石文字尙不能久良可歎也爰錄
朱學士碑以冀流傳焉其辭曰乾隆庚寅三月

工部營繕司郎中太谷孟君澔時奉 命督視
京師琉璃窑廠會工人取土於廠中隙地地穴
下數丈啓石見骨節甚鉅來告君疑古墓所在
親臨瞰之有風自穴中起若焚輪旋轉十餘圀
直上撲人沙石與之俱人皆狂走辟易仆地君
儼立不動風旋轉至君立處咫尺忽上冲決雲
際散去君曰此穴中骨尙有靈卽之命工轉石
石有字命拭字誌文見讀之有曰大遼故銀靑
崇祿大夫檢校司空行太子左衛率府率御史

大夫上柱國隴西李公諱內貞字吉美媯人
後唐莊宗時舉秀才除授將仕郎試移書省校
書郎守鴈門縣主簿次授儒林郎試大理寺守
媯州懷來縣丞亂後歸遼太祖一見器之加朝
散大夫檢校工部尙書兼御史中丞賜紫金魚
袋兼屬珊都提舉使太宗初改銀青光祿大夫
檢校尙書右僕射兼御史大夫世宗加檢校尙
書左僕射故燕京留守南面行營都統燕王牒
蠟以公才識具深委寄權要補充隨使左都押

衙中門使兼知廳勾次攝薊州刺史次授都舉
銀冶都監景宗改檢校司空兼御史大夫上柱
國次行太子左衛率府率保寧十年六月一日
薨於盧龍坊私第享年八十其年八月八日葬
於京東燕下鄉海王村孟君讀誌訖嘆曰公故
晉產也藏於燕自遼迄今八九百年予以晉人
遭之而顯于其重藏之乃命工人遷骨于高阜
大樹之左坎環以石石覆之向南起冢建誌石
於前走乞大興朱筠記其事筠按公薨在景宗

保寧十年景宗以宋太祖開寶二年己巳卽位
改元保寧其十年當宋太宗太平興國之三年
戊寅公享年八十追數之實生于唐昭宗之光
化二年己未也又按燕王牒蠟字述蘭遼史有
傳世宗紀天祿二年十月以中臺省右相牒蠟
爲南京留守封燕王誌所謂燕京留守南面行
營都統燕王是矣又天祿五年六月遣燕王牒
蠟冊劉崇爲大漢神武皇帝又太宗紀會同元
年七月遣中臺省右相耶律述蘭迭烈哥使晉

又趙思溫傳思溫會同初從耶律牒蠟使晉行
冊禮文字畧異實一人也至所稱南面行營都
統者牒蠟本傳失載而誌獨詳之誌又有云攝
薊州刺史使民由惠御衆在寬然則李公固茲
土之循吏也筠喜此誌旣足以證遼史而重惜
李公之名不見于史而賴誌以見于後世又嘆
宋謝惠連之于冥漠君唐薛稷之於杳冥君大
歷中蘇州觀察使李道昌奏虎邱寺有鬼作詩
隱於石壁敕令致祭山光二墳稱幽獨君並載

傳記然其姓名卒不可考今李公之未近千年
無知者而忽顯于孟君孟君之厚德邇昔人矣
且其葬處云京東燕下鄉海王村當今之琉璃
廠爲都人士市肆輻輳之區冠蓋之所旁午也
又以知遼之燕京在今京師之西北則夫地里
之變遷書傳之闕畧皆可感也於是乎悉其顛
末而爲之記時在乾隆三十六年辛卯九月十
五日也

郭元釭字于宮江蘇江都縣諸生康熙中供奉

內廷甲午京兆鄉試第二場表皇謨書黃挖

補被貼因作挖孔詩四首一時傳播第一首云

吾道真堪一喟然仰高未已忽鑽堅

第一場首題仰之彌

高似餐脈望三枚字未補蝸皇五色天眼底金

篋昏待刮年來玉楮刻將穿海山伴侶飛騰盡

慚愧偏爲有漏仙今一壑風烟集不載是詩世

罕知者後特授中書科中書舍人卒于官

半塘閒筆云西山僻處一古廟內相傳有怪人

莫敢宿旗人某素以膽氣自負隻身入廟宿焉

夜半有物劈門而入青面頰髯目光如炬黑毛
長尺許寒氣凌逼以兩手按旗人將鼻噓其左
臂冷不可當如置身冰雪中移時怪去天明旗
人回家左臂力增千觔右臂幾幾一羽莫舉如
癱瘓然

拂珊申副憲甫江都名宿著有集惜未壽梓頃
偶得快讀緣摘錄二篇於此其初夏偶作云早
是黃梅細雨時旅愁離恨共絲絲雖無置處貧
如此帶漸寬來病可知小檻獨憑人散後重簾

不捲燕歸遲心情大比常年減硯篋塵封嬾作
詩其旅思云二月天涯旅思交輕寒側側雪纔
消一庭芳草客惆悵幾點杏花春寂寥何處借
風吹好夢有時聽雨度清宵自從江令魂銷後
縹渺雲山不可招殊清新可誦

玉田縣有藍水水旁藍土如靛蓄靛而射利者
嘗取土和靛以貨賣

占城國人睡非至午不起非至子時不睡緬匪
常兩三日不食食惟炒野麥麴澗水調之閒亦

洩爲丸掛諸頸下同一天所覆者而賦性之殊
若此徑庭

頃閱黃太史之雋唐堂集有詠危危日詩一律
頗新奇漫錄於此其詩云豚蹄猶可祝汙邪諫
吉明禪望更奢上直五連元武宿下逢八次建
除家告虔語秘錢神享飲福筵開酒伴譁在昔
良方人未試聖門淵憲一咨嗟

京城有三海子衆水所歸處也水涸則藏麀兔
在城南者名南海子在城中者名中海子在城

北者名北海子蓋元時近處獵場也勝國及本朝皆仍其舊

唐六臣注昭明文選者李善呂延濟劉良李周翰張銑呂向也

長春宮元耶真人處機歸老處也有徒孫張志敬品行修潔亦封真人至元二年就長春宮設金錄大醮有羣鶴翔舞壇前去而復來者累日詞臣作瑞應記勒之石

王戎鑽去李核而售防人奪其利也然能却友

賻其父渾錢數百萬

劉知遠有二其一爲後漢高祖其一唐李密變名姓稱劉知遠

新疆巴里坤烏魯木齊葉爾羌庫車等處凡客死者親屬扶櫬回籍例給執照但墨筆標判鬼方得進內地其文云爲給照事照得某處某人年若干歲以某年某月某日病故某處今有親屬扶櫬歸籍合給執照牌仰沿路把守關門鬼卒驗明該魂放入毋得勒索致干未便故曉嵐

紀侍郎昀烏魯木齊雜詩中有幽魂未往隨官牒原鬼昌黎竟未聞句也

粉坊琉璃街有一宅多怪異人無敢賃者一部郎某貪其租廉僦居之有戚某坐書室挑燈夜讀忽承塵上窅窅作聲俄而掛下一半截尸然解行直撲人身急以手推之而起疾呼求救家人叢集更許始蘇述所見乃如此急勸其主人他遷焉

萬事不如杯在手百年幾見月當頭明朱存理

詩洪光時王鐸曾書以爲內庭楷帖

嘉靖閒一醫人置當舖入京時價騰貴可獲利
五倍醫曰必如直而賣醫家束手不敢用何以
救人命遂散之各舖取其半價全活甚多已而
有一中貴病延醫治之立愈謝以大厦并室中
器皿夜夢白鬚翁謂之曰此當歸報也